



Inatsisartuni ilaasortaq  
Laura Tàunâjik, Siumut  
/Maani

## **Eqqaavissuit inissiiviillu nakkutigisat pillugit § 37 naapertorlugu apeqqut nr. 200-mut akissut**

02. august 2016  
Sagsnr.2016-11585  
Dok. Nr.

Asasara Laura Tàunâjik

Postboks 1614  
3900 Nuuk  
Tlf. (+299) 34 50 00  
Fax (+299) 34 54 10  
E-mail: pann@nanoq.gl  
www.naalakkersuisut.gl

26. juli 2016-imi eqqaavissuit inissiiviillu nakkutigisat pillugit Naalakkersuisunut apeqquteqarputit. Apeqqutitit uannut akisassanngorlugit innersuunneqartut pillugit qutsavigaakkat.

### **1. Naalakkersuisut isumaqarpat nunatta eqqaaviisa ingerlanneqarnerat aaqqissugaanerallu naammaginartumik ullumikkut inatsisaasut naapertorlugit qulakkeersimaneqartoq?**

Nunatsinni eqqaavissuit pitsaanerumik ingerlanneqarsinnaapput ilusilerneqarsinnaallutillu. Taamaattumik 2014-imi maleruagassanik imaattunik aalajangersaasoqarpoq:

- Eqqaavissuarnik pioreersunik suliaqarnissamut maleruagassat, 12. juni 2014
- Inissiivinnik nakkutigisanik pilersuinerumut maleruagassat, 5. juni 2014

Maleruagassat taakku ilaatigut eqqaavissuarnik matoqqaanissaq imaluunniit inissiivinnut nakkutigisanut avatangiisillu pillugit akuerisanut allanngortiterinissaq siunertaralugu suliarineqarput. Eqqaavissuit inissiivinnillu nakkutigisanik sanaartorneq Naalakkersuisut eqqagassalerinermi sanaartornissamut pilersaarutaanni 2015-imeersumi suliniuteqarfissatut pingaarutilittut inissinneqarpoq. Aammattaaq kommunit nunami sumiiffinni assigiinngitsuni eqqaavissuarnik saliiinermik ingerlatsipput. Taamaattumik eqqaavissuarni pissutsit pitsaanerulernissaat aallunneqarpoq, aammalu siunissami inissiivinnik nakkutigisanik avatangiisillu pillugit akuerisanik sanaartornissaq sulissutigineqassaaq.

### **2. Eqqaaviit malittarisassat atuuttut naapertorlugit Naalakkersuisunit avatangiisinut attuumassutilitsigut akuerineqaaqassappat, aammalu Naalakkersuisut periarfissaqarpat akuersinermikkut toqqammavilersuissallutik?**

Eqqaavissuarnit amerlasuut avatangiisinut peqqussutip 1988-imeersup atuutilinginnerani pilersitaapput. Taakku ingerlanneqarnerisa nangingneqarnerini avatangiisit pillugit akuersissuteqartoqarnissaa piumasarineqanngilaq. Avatangiisinik innarliitsaaliuineq pillugu Inatsisartut inatsisaat nr. 9, 22. november 2011-meersoq naapertorlugu eqqaavissuit piffisaliussap iluani avatangiisit pillugit akuersissummik qinnuteqarfigineqartussaapput. Periarfissaq taanna Naalakkersuisunit atorneqanngilaq, kisiannili eqqaavissuarnik pioreersunik suliaqarnissamut maleruagassat aamma

inissiivinnik nakkutigisanik pilersitsinissamut maleruagassat matuma siuliani taaneqartut suliarineqarnissaat aalajangiunneqarpoq. Ilisimatitsissutigineqarsinnaavoq, avatangiisit pillugit akuersissuteqartoqarneranut atatillugu suliffeqarfimmut pineqartumut piumasaqaateqartoqartartussaammat.

**3. Naalackersuisut isumaqarpat immikkut malittarisassiuussinissaq pisariaqartoq s.a. nalunaarusiornikkut aalajangersarlugu eqqaaviit ingerlanneqarnissaat aqqissuunneqarnissaallu pillugu – tamanna ima ilusilerneqarluni piumasaqaatit malittarisassallu atuukkiartuaarnissaat ukiut siumut aalajangeriikkat iluanni, taaamaalilluni kommunit malittarisassanik nutaanik atuutsitsinermi malinnaasinnaanissaat siunertarlugu?**

2014-imi eqqaavissuarnik pioreersunik suliaqarnissamut maleruagassat aamma inissiivinnik nakkutigisanik pilersitsinissamut maleruagassat suliarineqarput. 2024 naatinnagu illoqarfinni nunaqarfinnilu eqqaavissuit tamarmik atorunnaarsinneqassasut imaluunniit inissiivinnut nakkutigisanut avatangiisillu pillugit akuerisanut allanngortinneqassasut, eqqagassalerinermi sanaartornermut pilersaarummi anguniagaasut ilagaat. Maannarpiaq maleruagassanik allanik nalunaarummilluunniit allamik suliaqartoqarnissaa eqqarsaatigineqanngilaq.

**4. Naalackersuisut naliliinerat naapertorlugu Nunatta eqqaaveqarfii allanngortiterneqarnissaanut taarsorneqarnissaannullu aningaasartuutaasussat qanoq annertutigissappat, eqqakkat nakkutigilluarneqarsinnaasut aammalu peqqissutsikkut avatangiisimullu illersorneqarsinnaasumik ingerlanneqarsinnaallutillu aqqissuunneqarnissaat anguniarlugu? Aningaasartuutigineqartussat qanoq kommuninit Namminersornerusunit akilerneqarumaarpat?**

Maannarpiaq suliassap taassuma akissaa aalajangeruminaappoq. Maannarpiaq kommunit nunatsinni sumiiffinni assigiinngitsuni eqqaavissuarnik saliillutik ingerlapput. Eqqagassalerinermi sanaartornermut pilersaarummi allassimasutut, immikkoortumut pilersaarummi missiliukkat nalorninarorujussuupput. Taamaattumik eqqaavissuarnik saliierni ingerlasuni misilittakkanik aalajangersimasunik peqartoqaleriarpat, misilittakkanik katersinissaq siunnerfigineqarpoq. Ukiup naanerani sanaartugassat tunngavissalimmik missiliorneqarnissaat siunertarlugu naliliinermik aallartitsisoqarnissaa Pinngortitamut, Avatangiisinut Nukissiuuteqarnermullu Naalackersuisoqarfiup naatsorsuutigaa.

Kommunit eqqagassalerinermut eqqagassanillu piaanermut akisussaasuupput, taakkunungalu avatangiisinik suliaqarnermut atortut pisariaqartinneqartut sanaartornerinut aningaasartuutit ilaapput. Kommunit aningaasanut inatsit aqqutigalugu kommunini avatangiisinik suliaqarnermut atortunut tapiiffigineqarnissamik qinnuteqarsinnaapput.

Inussiarnersumik inuulluaqqusillunga

Mala Høy Kúko